

8-9-2024

## Pakej 12A LRA Sungai Dua Bakal Tambah Kapasiti Air Di Pulau Pinang



GEORGE TOWN, 8 Sept (Bernama) -- Pakej 12A di Loji Rawatan Air (LRA) Sungai Dua yang dijadualkan dirasmikan pada Sabtu depan dijangka meningkatkan kapasiti rawatan air Pulau Pinang sebanyak 114 juta liter sehari (JLH) bermula bulan ini.

Ketua Pegawai Eksekutif Perbadanan Bekalan Air Pulau Pinang (PBAPP) Datuk K.Pathmanathan berkata Pakej 12A itu modul rawatan air baharu di dalam kawasan LRA Sungai Dua yang dibina sebagai respons terhadap peningkatan permintaan air pascapandemik.

Beliau berkata LRA Sungai Dua ialah loji rawatan air terbesar dan paling penting di negeri itu dengan membekalkan air terawat kepada kira-kira 465,000 pengguna air setiap hari.

"Oleh itu, manfaat Pakej 12A akan dinikmati 465,000 pengguna air di kawasan perkhidmatan LRA ini. Di tanah besar, kawasan perkhidmatan LRA Sungai Dua merangkumi kebanyakan kawasan di Seberang Perai Utara (SPU), Seberang Perai Tengah (SPT) dan Seberang Perai Selatan (SPS).

"Air terawat dari LRA Sungai Dua juga dipam kepada pengguna di Daerah Barat Daya (DBD) dan beberapa kawasan di Daerah Timur Laut (DTL) di bahagian pulau," katanya dalam kenyataan hari ini.

Pathmanathan berkata pihaknya juga mengepam hingga 33 JLH air dari Sungai Dua ke kawasan perkhidmatan Air Itam di bawah Pelan Tindakan Empangan Air Itam 2024 (AIDAP 2024) pada tahun ini.

Sementara itu, kerja-kerja pemasangan paip baharu yang merentasi Sungai Perai berhampiran Jambatan Ampang Jajar telah dimulakan dan dijadualkan mula beroperasi pada Jan 2026.

Beliau berkata apabila siap kelak boleh menambah dan meningkatkan jumlah air terawat dari LRA Sungai Dua ke bahagian pulau sekali gus dapat menangani isu kekurangan air di beberapa kawasan tanah tinggi dan kawasan hujung paip agihan (HPA) di DBD serta DTL.

Pemasangan paip berkenaan akan membekalkan lebih banyak air kepada kira-kira 120,000 pengguna air di bahagian pulau termasuk kilang di Zon Perdagangan Bebas Bayan Lepas selain meningkatkan kestabilan perkhidmatan bekalan di kawasan barat, barat daya dan selatan pulau.